

UMP tawarkan **2,153** tempat

Mahasiswa baharu berpeluang mohon biasiswa menerusi dana MyGift

■ **SHARIFAH HAZIRAH AL-JUFFRY**

KUANTAN - Seramai 2,153 mahasiswa baharu ditawarkan tempat bagi mengikuti 25 program pengajian lepasan Sijil Tinggi Pelajaran Malaysia (STPM) dan setaraf bagi sesi akademik 2016/2017 di Universiti Malaysia Pahang (UMP).

Daripada jumlah itu, seramai 896 adalah mahasiswa lelaki manakala 1,257 perempuan yang bakal mengikuti pengajian mereka di Kampus UMP Gambang dan Pekan.

Naib Canselor UMP, Profesor Datuk Dr Daing Nasir Ibrahim berkata, mahasiswa baharu yang mendaftar masuk UMP untuk melanjutkan pengajian bagi sesi 2016/2017 ini berpeluang memohon biasiswa UMP yang buat pertama kalinya diperkenalkan pada tahun ini menerusi dana MyGift.

"Mahasiswa yang mempunyai latar belakang keluarga miskin tetapi memiliki keputusan cemerlang untuk meneruskan pengajian di UMP serta memenuhi kriteria dan memenuhi syarat-syarat kelayakan asas dan juga



Daing Nasir (tiga, kanan) beramah mesra bersama mahasiswa baharu UMP sesi 2016/2017.

husus ditetapkan universiti layak untuk memohon dan menerima bantuan yuran pengajian mereka.

"Selain itu, menerusi inisiatif program MyGift juga, satu Skim Bantuan Insentif Pendidikan bernilai RM 1,000

bagi seorang mahasiswa diluluskan untuk manfaat sepuluh mahasiswa baharu yang menghadapi masalah ke-

wangan yang mendaftar hari ini (semalam)," katanya.

Beliau berkata demikian ketika ditemui selepas bertemu mahasiswa dan keluarga pada hari pendaftaran kemasukan pelajar baharu di Kompleks Sukan UMP di sini, semalam.

Seramai 19 pelajar antarabangsa dari Sudan, Yemen, Somalia dan Indonesia mendaftar pada 26 Ogos lalu bagi kemasukan kali ini.

Daing Nasir berkata, permohonan bantuan itu akan disaring di peringkat Jabatan Hal Ehwal Pelajar & Alumni bertujuan membolehkan para mahasiswa baharu yang mempunyai masalah kewangan dapat menyediakan keperluan berkaitan bagi memulakan pengajian.

Sepanjang Minggu Induksi Siswa 2016 bermula hari ini sehingga 31 Ogos nanti, mahasiswa akan mengikuti Majlis Amanat Naib Canselor dan Ikrar, Program Mahasiswa Sihat 1 Malaysia, Diskusi Mahasiswa Cakna, info pembiayaan dan kebajikan pelajar dan Info Akta Universiti dan Kolej Universiti (AUKU) serta taklimat akademik.

SINAR HARIAN
 (SENTRAL)
 29 Ogos 2016 m/s 39